

Kolosi

1 ¹Aya Pol, Negur nē oroya bunem Kristus Jesus nē aposel wō aun ado, neda turada Timoti adom,
²oun Kolosi taun, Negur nē fateul tamo kayau, Kristus bun momoiya turamā tar bun pas enei matotkeneik.
Wau ifenēya ado wau inosiya, Tamada Negur bunem ā bun ibodōf.

De Fiyēya Ado Kosēya

³Sain amā ā nigin kosē mauf bun, amā faimud neda Odug Jesus Kristus nē Tama, Negur de mafiyēdig, ⁴ere nigin, amā Kristus Jesus bun āgenei momoiya ado, ā Negur nē tamo kayau ganan nigin wauī laa fiya anī karī maun. ⁵Ā mogo momoi nē od, biya od ā bun isin anī karīg fen, ereb ā nigin saa ilun inon nigin wauī ise fen, momoiya ado wauī laa fiya anī wō yen. ⁶Sain ā biya od anī karīg fen, Negur nē wau ifenēya momoi bagai kelein sain anī bunem ilauf ganan, biya od anī ā atun age fen gen, teneub ganan bun, biya od enei faat yu ken, odugef. ⁷Ā, nemā oboimā ferfer turamā Epafras bun keleī anī walegen, ī amā nawamā yaleya, Kristus nē kabī tamo dō fiya biya, ⁸agef fen, inimeg āgenei Awa Uur bun wauī laa fiya nigin irokanaman.

⁹Age fiya nigin, sain amā ā nigin karī maun bunem isif ganan, amā ā nigin Negur kosē mafiye ken, uur nē kisi biya ado kisi fokōya ganan bunem Negur nē oroya nigin keleī aura yeif nigin to fiyēya to matorōdig. ¹⁰Age mafe fen, amā, ā Odug nē oroya bun ubodōg fen, ereb ereb ganan bun Odug wau al foug nē anī ago gouf nigin kosē maudig: faat biya kabī biya ganan bun yūf nigin, Negur nigin keleī, ā bun odugouf nigin, ¹¹yogon fula fiya medeīya nē megeir bunem megeir ganan ifeneī di, ā ereb ereb ganan bun, feseya sā megeir bagai ufaragauf nigin, agef fen, wauī kulīya ado, ¹²Tamada ī, ā lalan nē tano bun Negur nē tamo kayau neid akor weim walogouf nigin age fen anī, de wiyēgouf nigin kosē maudig. ¹³Ere nigin, ī ada gugum nē megeir bun yalelnada fen, in Naal Negurem ī nigin wau laa fedig anī nē tano bun gei fada irou isidan. ¹⁴Ī Naal bun ada kel yaledan, neda mosor nigin weder tu kelen.

Kristus Ī Ereb Ereban Ganan Wal Fiya

¹⁵Kristus ĩ, Negur ada to tailef anĭ nē malakanon, ĩ Negur nē kesu matu, ereb ereb inodin ganan anĭ nē mudur inenen. ¹⁶Are, Kristus ĩ bunem ereb ereb ganan inodin, ereb ereb saa ilun ifaredif ado tenebur ein ifaredif, ereb ereb tailef ado to tailef, king, megeir, uyu iroudiya be, yeneid adodo; ereb ereb ganan Kristus bunem Kristus nigin ye fen, inodin. ¹⁷Kristus ĩ ereb ereb ganan wōya sã mog, ibodon, agef fen, ĩ bun ereb ereb ganan ifaref. ¹⁸Ī bouwa are sios, ĩ yogo anĭ nē mudur. Ī gariya, tamo gare den bun tamal uyulil kel fã yen, are ereb ereb ganan bun ĩ mudur ibodōf nigin age fen. ¹⁹Negur ĩ yogon kisi feleya bagai anĭ ganan, Kristus bun ibodōf nigin oro fen, ²⁰Ī Kristus nē naud aa tetek bun fi felen anĭ bunem maror ino fen, Kristus bunem ereb ereb ganan tenebur ifaredif be, saa ilun ifaredif, ĩ geid komo difouf nigin oron.

²¹Uruwa bun, ā Negur nigin gerō ufareg fen, āgenei tobonunā sane bunem, āgenei kisi bun Negur nigin kiwai ubodōgen. ²²Anĭ ere gama, Negur ĩ, Kristus nē bouwam laa bunem, yogon lo fiya bun ā fateul, amuyē sã, od sã ineneif nigin ĩ geid komo yein. ²³Ā āgenei momoiya tobol ge fen, feseya sã totol ufareg fen, biya od karĭ gen sain bun wauĭ iseya walegen anĭ bun to ulegef usigef gouf are, agog wō gouf. Biya od enei are, ereb ereb ganan saa farumen ifaref anidi bun kurō fesin, agef fen, aya Pol biya od anĭ nē kabĭ tamo wō aun.

Pol Sios Nigin Kabĭ Totol Yalen

²⁴Gama aya ā nigin darau alef anĭ nigin wau al fef, age afe fen, Kristus ĩ yogon bouwa sios nigin darau yalen bun fau to kisi felef anĭ kisi falauf nigin, aya bouwaum darau anĭ ale di, kisi falauf. ²⁵Aya Negur nē od anĭ kisi feleya bagai afeneif nigin, Negur kabĭ ifanan anĭ nē kabĭ tamo wō aun. ²⁶Negur nē od are ĩ waa, kulunem ibor isin ganan bun iminēyan ibodon anĭ, gama Negur nē momoiya tamo kayau bun yaor fen. ²⁷Negur nē tamo kayau bun, Negurem waa enei nē fula fiya medeĭya barikā anĭ naig be fiya anĭ, haiden atun yaor fouf nigin wau iron, waa are Kristus ā namein ibodok, anĭ nē fula fiya medeĭya nigin wau iseya anĭ.

²⁸Amā ĩ nigin kurō mafalaisi, tamo kayau ganan wedereid maroud fen, kisi biya ganan bun, tamo kayau ganan mafelnēdidig, are amā tamo kayau ganan Kristus bun, kisi feleya bagai manenēdiyof nigin age mafef. ²⁹Enei kisi falauf nigin, aya kabĭ totol alef, yogon megeir aya nameun ibod ken, kabĭ totol yalef anim aya gunĭ auf.

2 ¹Aya ā nigin, idi Laodisia taun difaref anidi nigin ado, idi aya to bagai dileyaf anidi ganan nigin, naig afe gunĭ auf anĭ, ā keleĭ youf nigin orouf. ²Neu kisi bagai are, idi waud alese di, wau laa fiya bunem waud katō difouf, age fe di, idi kisi fokō feleya nigin keleĭ barikāf, anĭ

bunem, idi Negur nē waa keleĩ youf, are Kristus. ³Ī bun kisi biya ado keleĩ nē safina biya ganan inokon ibodok. ⁴Aya taka nem meleĩ yaleya od biyai biyai bunem to idegneĩf nigin enei arokeneik. ⁵Momoi, aya bouwaum ā geid to tabodok, anĩ ere, aya uur bun ā geid tabod ken, ā naig be ge tutuk ufareg fen, āgenei Kristus bun momoiya naig be fe megeir ifaref anĩ, ileyā nigin wau irok.

Tamo Nē Lo Wal Fe Fen, Kristus Bun Mata Ibodōya

⁶Ā Kristus Jesus āgenei Odug walegen, anĩ nigin, ā ĩ bun mata ubodōgouf. ⁷Ī bun warei urarāg fen, fō kare gen walesagauf, ā difelnein kilei, āgenei momoiya bun megeir ge fen, de fiyēya anĩ ā bun ise gogū fouf.

⁸Taka nem ā, tamo nē idegēya keleĩ kaũ sā bunem to gurar yei irouleyeĩf nigin lo walagauf, are Kristus dō fiya ban, tamo nē tobonunā ado tenebur enei nē tobonunā dō fiya nigin.

⁹Ere nigin, Kristus bun Negur nē kisi feleya bagai ganan bouwa bun ibodok. ¹⁰Agef fen, ā Kristus bun kisi feleya bagai ifenein, Kristus ĩ megeir ganan ado yeneid adodo ganan neid mudur. ¹¹Ī bun āg mulū ulegen, are tamo imam mulū bun ineneiya sā, anĩ ere, mosor nē oroya yaleleya nigin, Kristusem mulū bun inenein. ¹²Ā, ĩ geid naan yaleya bun mū yei ken, Negur ĩ laa bun tamal Kristus kel turĩ fiyen anĩ nē megeir bun, āgenei momoiya bunem ĩ geid kel turĩ yein.

¹³Sain ā, āgenei mosor nigin ado āgenei mosor nē oroya nigin mulū ileyā sā nigin, laa bun ufareg mog, Negur ĩ, ā Kristus geid kel turĩ yein. Ī neda mosor adok nigin weder tu kelen. ¹⁴Ī lo nē ĩtāfiya itotoya, are ada weteda kiwai ibodon anĩ isasalen, ĩ anĩ yalel fen, aa tetek bun yun. ¹⁵Agef fen, ĩ, megeir adodo yeneid adodo neid totol ganan, ye farumen gō fel fen, Kristus nē aa tetek bunem kusĩ bun idi wal fedin anĩ dilouf nigin, ganan meleid bun yaor fen.

¹⁶Anĩ nigin, ā saaf be naan wāgauf, uub sifa naa fire fire be, ogō mata sigigi fiya naa be, Sabat naa^a to dō gouf bun, taka nem to es yeif. ¹⁷Eneidi are, ereb fau isiyouf nē malakanon. Anĩ ere, ereb momoi bagai are Kristus bun fotou fiyauf. ¹⁸Aib taka ĩ, mala yaleya nigin wau yukesileya ado engel yeneid yaleseyā nigin wau al fef anim, ā mala solo walogouf anĩ to wal yeif. Tamo age fiya ĩ ereb ilen anĩ nigin nenerĩ meluk dir fe fen, yogon bouwa nē oroya anim, gariya sā fagā yedig. ¹⁹Ī bouwa nē mudur Kristus anĩ folō fel fen ifaren, mudur are Kristus, ĩ bunem bouwa ganan tuwa katō fiya ado dirumunā anidim disennē di, katō fel ifar fen, Negur yogo age fe di, odugedig.

²⁰Ā Kristus geid tenebur enei nē tobonunā bun laa yein, age fiyauf are, ere nigin anĩ ā fau anĩ nē gen ufareg fen, yogon ĩtāfiya eig fiya farumen

^a 2:16 Sabat naa anĩ, Juda neid uub nē naa.

ufaregef, ²¹“Ā to uroug! Ā to kobūg uleg! Ā to dorōg uleg!”? ²²Enei ganan are, kabī wenēge di, sa kalauf, ere nigin, idi tamo nē itāfiya ado tai fiya dogol. ²³Momoi, itāfiya age age fediya are, dogo neid kisim seli kulō fiya, dogo neid idegēya waud yukesileya ado, dogo neid bouweid kafī fiya ifenēya bun, kisi biya gen ulegedig, anī ere, idi bouwa nē oroya lai fesileya nigin kisi feleya sā.

Fateul Ibodōya Nē Faded Fiya

3 ¹Age fiya nigin, ā mogo Kristus geid keg fā gen nigin, āgenei wauī ereb ereb ilun nē nigin, Kristus Negur ima biyalē ibodok nē an, unogouf. ²Āgenei kisi ereb ereb ilun nē nigin unogouf, ereb ereb tenebur nē nigin sā. ³Ere nigin, ā gareg fen, āgenei mata gama Kristus geid Negur bun inokon. ⁴Kristus ī āgenei mata, ī wō youf sain bun, āg ī geid fula fiya medeiya bun wō gouf.

⁵Anī nigin, ereb ereb āgenei tenebur nē oroya nē anī udenkesig: noli tobonunā, amuyē tobonunā, noli kisi, oroya sesen ado, safina musei youf nigin ima su lai fe fen sū we fiya (are idegēya waitou seli yabiya). ⁶Eig fediya nigin, Negur nē didi isif. ⁷Ā uruwa ubodōgen, naab enei bun uyōgen. ⁸Anī ere, ā gama naab eig fediya, wau saneya, didi iseya, tobonunā sesen inoya, dumen od irōya ado, sigoreī bun od sesen wogōya, anī ganan utorōgouf. ⁹Ā abob to udegnēgouf, ere nigin, āgenei bouweī nē oroya tubu yogon tobonunā ado urailleg fen, ¹⁰oroya mata ufonūgen, are Negur nē malakanon nigin keleī bun mata falei yeīdig. ¹¹Ein baban, Grik tamo be Juda tamo, mulū ileya be mulū ileya sā, yaū tamo be tamo kuī gen, ferfer be kafī fiya sā tamo gen, fire fire to ibodok, anī ere, Kristus ī anī ganan, ī ganan anī namedin ibodok.

¹²Anī nigin, ā tamo kayau Negurem igrinein, fateul ado Negur nē oboi tar nigin, wau yūya, tobonunā biya, wau yukesileya, molol ado, kaisā to seyeya anī ufonūgouf. ¹³Molol ufareg fen, abob nigin morō faali gouf, agog fen, ā atun abob ereb morō ibodōf anī nigin wedereī tu kalauf. Odug āgenei mosor nigin weder tu kelen gen, āg mosor nigin wedereī tu kalauf. ¹⁴Agog fen, enei ganan teten, wauī laa fiya ufonūgouf, anim ereb ereb ganan tekelei guf irouwauf.

¹⁵Kristus nē wau inosiya āgenei wauī bun utorōg len, ulum irouwauf, ere nigin, ā bouwa tekelei bun wau inosiya bun iweignein. Agog fen, Negur de wiyēgouf. ¹⁶Utorōg len, Kristus nē od fatuk bagai ā namein ibodō di, ā kisi biya ganan bunem abob ufelnēdig fen, abob weder urougauf, agog fen, od Negur nē Itotoya Sam bun ibodok, Negur yana yaleseya seg ado, uur nē seg, āgenei wauī bun Negur de fiyēya ado walogouf. ¹⁷Agog fen, ereb ā ago gef, od bun be kabī yaleya bun, anī ganan Odug Jesus yana bun agog fen, ī bunem Dei Negur de wiyēgouf.

Momoiya Tamo Kayau Ibor Mata Ibodōya Nē Faded Fiya

¹⁸Kayau, āgenei tamo farumen ubodōgouf, are Odug nē lo fiya bun biya bagai.

¹⁹Tamo, āgenei aiwei tar nigin wauī laaf fen, idi waud morō to wenēdigouf.

²⁰Kesu, ā ereb ereb ganan bun sinei temeī tar sigoreid dō gouf, anim Odug wau al fouf.

²¹Tama, ā gerenei tar to waud saneya wenēdigouf, ago gouf, idi agogon de fen, waud to al fouf.

²²Ferfer, ā ereb ereb ganan bun, āgenei marau tenebur enei nē sigoreid dō gouf, idi meledin dogol idi biya difamāf ya bunem meleid yaleya nigin dogol to ago gouf, anī ere, ā wauī momoi nē ado Odug nigin anini ge fen, ago gouf. ²³Ereb ago gef ganan, wauī adok iro ken, ago gouf, tamo nigin sā, Odug nigin kabī alef ge fen, kabī walogouf, ²⁴ere nigin, ā keleī, ā Odug bun tamal in akor mala solo walogouf. Are Odug Kristus anī ā aruna walekenēgef. ²⁵Aib taka ī sane age fouf, yogon sane age fiya nigin mala solo sane yalouf, ere nigin, an anī kinau ya sā.

4 ¹Marau ā, āgenei ferfer ereb madur ado biya anī wenēdigouf, ere nigin, ā keleī, āg saa ilun āgenei Marau ibodok.

Faded Fiya Tunī

²Kosēya anī total uroug, lo weleg fen, Negur de wiyēgouf. ³Agog fen, amā nigineg kosē gouf, are Negur amā od wogō mauf nigin bobog kā fel kanamā di, amā Kristus nē waa kurō mafalaisiyouf nigin kosē gouf, anī nigin aya kalabus bun abodok. ⁴Negur aya biya od wogō auf nigin ifanan anī, sā yaor kurō afalaisiyouf nigin kosē gouf. ⁵Ereb tamo kayau serē temeleid bun ago gou fenē, kisi biya ado ago gouf. Sain biya ā nigin wō youf ganan to sekil gouf. ⁶Āgenei wogōya sain bun ganan wau ifenēya barikāf, od kariya biya dogol wogō gouf, anī bunem, ā, tamo kayau ganan naig be fe solof irokenēdiya nigin keleī youf.

Idikeleya Nē Aanya

⁷Tikikusem aya nigin od ganan wogō yeif. Ī neu turau oboiyou, kabī tamo dō fiya biya fen, Odug bun kabī turau. ⁸Aya, ī, ā bun enei nigin bagai sur afiyek, are ā, amā naig ma mafaref anī keleī di, anī bunem ī āgenei wauī yalesauf nigin, age afef. ⁹Ī Onesimus ado disiyouf, Onesimus ī neda turada dō fiya biya oboida, ī āgenei taka. Idi ereb ereb ganan ein agef wō yef anī dirokeneif.

¹⁰Neu kalabus turau Aristakus, ā bun yogon aanya sur fef, Mak, Banabas ne tam, īg agef aanya sur fef. (Ā ī nigin faded fiya walegen. Ī ā garan isiyouf are, ā ī walogouf.) ¹¹Jesus ī yana taka Jastus dedig, īg aanya sur fef. Negur nē tano nigin neu kabī tamo turau tar atun, idi dogol anī Juda temeleid. Age de fen, idi momoi bagai de fen, neu wau dalesen. ¹²Epafras ī āgenei taka, Kristus Jesus nē kabī tamo, ā bun aanya sur fef. Ī faimud kosēya bun ā nigin total inodig, are ā Negur nē oroya

ganan bun, kisi feleya bagai ado momoiya odug bun total ufaragauf nigin age fef. ¹³Aya, ĩ, ã nigin, idi Laodisia taun difaref anidi nigin ado, idi Hierapolis taun difaref anidi nigin kabĩ total yaledig anĩ, sã ĩ nigin kurõ afesif. ¹⁴Nemã oboimã dokta Luk ado Demas aanya sur difef. ¹⁵Tureĩ tar Laodisia taun dibodok anidi bun ado, Nimfa ado sios yogon fõ bun guru difef anidi bun, neu aanya wenẽdigouf.

¹⁶Pas enei uweseg le di, Laodisia sios buneg diwesauf, abag, Laodisia tamal paseg uwesagauf.

¹⁷Akipus urokenẽg, “Õ Odug bun kabĩ walen anĩ, el wo udikalauf nigin karĩ walauf.”

¹⁸Aya, Polem aanya enei imaum bagai atotof. Aya kalabus bun abodok anĩ karĩ walagauf. Wau ifenẽya ã ado ibodõf.